

kröftum, að láta hann flytja lesendum sínum fróðleik úr heimi andans sem víðast að. Ennfremur mun hann einsog að undanfögnu flytja skáldskap bæði í bundnu og óbundnu máli eftir því sem rúm leyfir í hvert sinn og ritstjórninni þykir við eiga. Íslenzkt tímarit, sem ekki flytti skáldskap er óhugsanlegt, og Heimir vill vera íslenzkur. en þó ekki svo að það olli þröngsýni á nokkurn hátt.

Þeir sem hafa styrkt blaðið að undanfögnu eru vinsamlega beðnir að gera það eftirleiðis. Þeir sem eru málefnum þeim, er það sérstaklega fylgir fram á einhvern hátt hlyntir, eru beðnir að styrkja það með því að kaupa það og lesa. Nytsemi blaða og tímarita er ekki öll undir útgefendum og ritstjórn komin, hún er líka komin undir kaupendum og lesendum—Hjálpist oss að gera Heimir eins nýtsaman og framast er unt.

Öllu aðsendu verður með ánægju veitt móttaka, og birt eftir því sem kringumstæður leyfa. Handrit öll, og bréf innihaldi blaðsins viðvikjandi sendist til Guðm. Árnasonar, 521 Victor St.. en borganir allar til Hannesar Péturssonar, Union Bank, Sargent Ave.

Gamla velunnendur og styrktarmenn Heimis biðjum vér sérstaklega að sýna honum velvild þá, er hann hefir notið að undanfögnu.

STJÓRNARNEFNDARFUNDUR

*hins íslenska unitaríska kyrkjufélags
í Vesturheimi*

Þann 23 Sept. síðastl. hélt stjórnarnefnd hins íslenska únítaríska kyrkjufélags í vesturheimi, á samt öðrum útistandandi nefndum þess félags fund í íslenzku únítara kyrkjunni í Winnipeg. Á fundinum voru lögð fram nokkur nefndar álit, sem voru rædd og falin nefndunum á hendur til næsta þings til frekari framkvæmda.